

Kantaninga te Uea: Ke e Tauaki Am Taeka

Iroun Unimwaane Robert D. Hales

Man te Kooram n Abotoro n te Tengaun ma Uoman

Bukin maiura i aonteaba bwa ti na rikirake, waakirake, ao ni kamatoatoaki n oin ara taneiai ae ti rinanona

Ni ingabongin te Tabati aio, ti anga ara kaitau ibukin ao ni kakoaua bwa E maiu ara Tia Kamaiu. Ana Euangkerio e a tia ni kaokaki rinanon te burabeti are Iotebwa Timiti. E koaua Ana Boki Moomon. Ti kairaki iroun te burabeti ae maiu, Beretitenti Thomas S Monson. E kakawaki bwa, ti na kaota koauan Ana mwakuri ni kamaiu Iesu Kristo ao Kakabwaia ake a bwaro ma iai.

Inanon namwakaina tabeua n nako, E reke au tai ni kamatebwaia ao n reiakina riki aron ana karea ni kamaiu te Tia Kamaiu ao arona ni katauraioia ni karaoa te anganano ae akea tokina ibukira n tatabemaniira nako

E a Kaman moanaki ana katauraioi n te maiu are imwain aio ngke E tataninga Tamana ao e taku bwa ke e tauaki ana taeka Tamana ana bwai te neboaki n aki toki.¹ Ni moanaki man te tai anne ao ni waaki nako ni karokoa te bong aio, E kabongana Inaomatana ni butimwaea ao ni karaoa Ana Kainibaire Tamana are i karawa. A reireiniira booki aika tabu bwa inanon Rikirakena, E “karaoa [Ana] mwakuri Tamana”² ao “ni kantaningaa te Uea ibukin rokon Ana tai ni mwakuri.”³ N Ana ririki ae 30, E rotaki ni korakoran te karirii ngke totoko ni kangai, “Naako akuu Taatan.”⁴ I Ketetemwane, E onimakina Tamana, ngke e kangai “E ngae n anne e na aki tauaki au taeka, ma ke e tauaki am taeka,”⁵ ao ngkanne E rineia bwa e na korakai ibukin ara bure. Rinanon kabowiakina ni kamangoraki ao kainnanona n taurakina n te kaibangaki, E kantaningaa Tamana ni motikia bwa E na “ikoaki ibukin ara bure ... [ao] ni maraki ibukin ara buakaka.”⁶ E ngae ngke E tang n taku, “Atuau, Atuau E aera ngkai ko kitanai?”⁷ E kantaninga Tamana—ni kabongana inaomatana ni kabwarai aia bure Ana kairiribai, 8 n nooria bwa Tinana e tararuaki, 9 ao n teimatoa ni karokoa te toki ni karokoa e toki maiuna ao e tia Ana mwakuri.¹⁰

I aki toki ni iaiangoia, Bukin tera bwa Natin te Atua ao Ana burabeti aika tabu ao ni kabane kaain te aro aika Itiaki iai katakiia ao aia kanganga, e ngae ngke a kataia ni karaoa nanon Tamara are i karawa? Bukin tera ngkai e matoatoa, ai moarara riki tii ibukiia?

I iangoa aron Iotebwa Timiti, are rotaki n te aoraki ao te ataeinimwane ngaia ae bwainikirinaki inanon maiuna. E tang n aiaron te Tia Kamaiu ao ni butia te Atua bwa E mena ia.¹¹ Engae ngke tii ngaia, e kabongana inaomatana ni kantaninga te Uea ao ni

karaoa nanon Tamana are i karawa.

I iangoia ara bakatibu aika bwaeoniia, ni kakioaki nako mai Nauvoo ao n rinanon taabo aika a aoraoi, a kabongana inaomataia n rimwin te burabeti e ngae ngke a rotaki n te aoraki, te mwengabuaka, ao te mate. Bukin tera a rinanon kanganga aika kakamaaku aikai? E na kanga tokina? A riki ibukin tera?

Ngkai ti titiraki taian titiraki aikai, ti ataia bwa bukin maiura i aonteaba bwa ti na rikirake, wakirake, ao ni kamatoatoaki n oin ara taneiai ae ti rinanona. Ti na kanga ni karaoa aei? E anganira te kaeka booki aika tabu n ti te mwakoro n taeka ae tii teuana: ti na “kantaninga te Uea.”¹² Kataitai ao kataki ti bane n anganaki. Kakaewenako ni maiura aikai a butimwaira ao Tamara are i karawa n noria bwa ti na kamwakura inaomatara n rimwin Natina. E a tia n ataia, ao e reke ara tai n reiakinii, bwa akea bongan ae ai matoatoara ara kanganga, bwai aikai ni kabane ana riki bwa kataneiakira, ao tamaroara.¹³

Nanon aio ti na riai n atai kakaewenakoakira n taainako? Ti aki kona ngaira, n taai tabetai, n iai bukin titirakira, O te Atua, ko mena ia?”¹⁴ Eng Ngkana e mate te buu, toana e na mimii (bwa e mena ia te Atua). Ngkana e rotaki te utu n taekan te kataumwane, e na titiraki te karo (bwa e mena ia te Atua). Ngkana a titionako ataei man te kawai, te tina ao te karo a na tang n nanokawaki. Eng, “te tang e teimatoa inanon te tairiki, ma e roko te kukurei n te ingabong.”¹⁵ Ngkanne, inanon moan rikiraken ara onimaki ao ara ataibwai, ti teirake ao n rineia bwa ti na kantaninga te Uea, ni kangai, “Ke e na tauaki am taeka.”¹⁶

Tera, ngkanne, ae nanonaki ni kantaninga te Uea? Inanon booki aika tabu, te taeka tataninga nanona ni kantaninga, katautaua, ao ni kakoaua. Ni kantaninga ao ni kakoaua te Uea e tangira te onimaki, te taotaonaki n nano, te nanorinano, te nimamannei te taotaonannano n te tai ae maan, kawakinan tuua, ao te nanomwaaka ni karokoa te toki

Ni kantaninga te Uea nanona unika koraan te onimaki ao ni kamwarakea “ma te botumwaaka, ao ... te taotaonannano.”¹⁷

E nanonaki bwa te tataro n aron ae karaoia te Tia Kamaiu—nako te Atua, Tamara are i karawa—e kangai “E na roko ueam. E na karaoaki nanom.”¹⁸ Bon te tataro ae ti anga ma tamneira ao rabwatara, n aran te Tia kamaiu, Iesu Kristo

Kantaningaan te Uea e nanonaki ni iangoia inanora ao “ni kare[kea] te Tamnei are Raioiroi” n te aro bwa ti kona n atai “bwai aika ti riai ni karaoi.”¹⁹

Ngkana ti ririmwin ana kairi te Tamnei, ti na kunea bwa “kanganga e mwakuria te taotaonannano”²⁰ ao ti reiakinna n teimatoa inanon te taotaonannano ni karokoa [ti]

kakororaoki.”²¹

Ni kantaninga te Uea nanona n “teimatoa”²² ao ni “waaki nako” inanon te onimaki, “ma te kantaninga ae tamaroa ma ni kororaoui.”²³

E nanonaki “n ti onimakina ana mwakuri aika a raraoui Kristo”²⁴ ao ma [Ana] akoi ni buokira, e taku nakon te Uea bwa ti tangira Nanona ma tiaki nanora ae e na karaoaki.²⁵

Ngkai ti kantaningaa te Uea, ti “aki kamwaingaki ni kawakinan taian tua,”²⁶ n ataakina bwa ti na “motirawa n te bong teuana man [ara] kanganga nako.”²⁷

Ao ti “aki karenakoi ... [ara] kakoaua”²⁸ bwa “bwai ni kabane aika [ti] a tia ni karawawataki iai a na uaia ni mwakuri ibukin raoiroira.”²⁹

Taian kataaki aikai a na roko n aekakia aika kakaokoro. Te bwai are e rinanona Iobi e kauringiira bwa ti na weteaki man rinanona ni uaa te toki. E kabuai ana bwai ni kabane Iobi, ni ikotaki ma abana, ana auti ao ana man; kaain ana utu; aroarona; marurungina, ao arona n aomata. E ngae e rotaki n te bwaranano, e kantaninga te Uea ao e kaota ana kakoaua ae mwaakaroiroi. E taku:

“Ma I ata au tia kamaiu ba E maiu, ao E na tei rake rimwi i aon te aba:

“Ao rimwi ngkana ... e a tia ni kamaunaki kunu ae rabwatau aei, Ao N na bon nora naba te Atua ngkana akea irikou.”³⁰

“Ao ngkana e tiringai, eng N na kakoaua.”³¹

N ana kakairi aika tamaroa Iobi, taian burabeti, ao te Tia Kamaiu, ti na kunea bwa a kaunganano n tataninga iroun te Uea, ai moarara riki ngkana ti aki kona n oota n Ana babaire ao ana kantaninga ibukira. Te ataibwai anne e bon aki toki n anga “teutana imwiin teuana [ao] te reirei teuana imwiin teuana.” ³²

Inanon maiu I a tia n reiakina bwa n tabetai I aki karekea kaekakin au tataro bukina bwa te Uea E ataia bwa I aki tauraoi. Ngkana E kaeka, E boni kangai “teutana imwin teutana”³³ bukina bwa arei ni kabane ae I kona ni kaitara ke ni kabane aika I kona ni karaoui.

Ti tataro n angiin te tai bwa e na iai iroura te raunnano, ma ti tangiria ngkai naba! Ngke te ataeinimwane, Beretitenti David O MacKay e tataro ibukin te tia kakoaua ibukin koauan raoi te euangkerio. Inanon ririki aika mwaiti imwiina, ngke mwakuri ni mitinare i Scotland, te tia kakoaua arei e a roko. Rimwi ao e korea, “Bon te kakoaua nakoiu bwa te

tataro ma te nano ni koaua e a kaekaaki n ‘tabetai n te tabo teuana.’”³⁴

Ti kona n aki ataia bwa ningai ke E kanga Ana kaeka te Uea n anga, ma n Ana tai ao n Ana Kawai, I kakoaua, a na roko Ana kaeka. Ibukin kaeka tabeua ti na tataninga ni karokoa taai rimwi ibukiia kain te utu. Ti na aki bwara n nano nakon te Uea. Akea tokin ana kakabwaia, ti aki ti n tabetai. .

Kantaningaakin te Uea e anganiira te tai ae akea boona ni kunea bwa a mwaiti aika tataningaira. Natira a kantaningaira ni kaota te taotaona n nano, te tangira ao te oota ibukiia. Ara karo a tataningaira ni kaota te kakaitau ao te nanoanga. Tarira ao mwanera a kantangaira ni kaota te mwamwanano, te akoi, ao te kabwarabure. Kain abara a kantaningaira n tangiriia n aekan te Tia Kamaiu are tia n tangirira n tatabemaniira.

Ngke ti rinanon kainnanon te rabwata, ao ti rikirake n ataia bwa mwaitira aika kakantaningaira. Nakoia aine aika kakaonimaki nakon te Uea ma, aomata aika raoiroi ake a tararuiaia aoraki, kamarurungia aika mamara, ao n tararuiaia aika aoraki n te iango ao n rabwataia. I namakinna ni kabwarabwara Aia kaitau ao Aia tangira Tamara are i karawa ao Natina ae Tangiraki. N ami mwakuri ni mitinare n aekan Kristo, kam tataninga te Uea ao kam karaoa nanon Tamara are i karawa. E oota iroumi Ana karaunano. “Ba ngke kam karaoi baikai nakon temanna ae moan te mangori i buakoia tariu, ao kam karaoi naba nako Iu.”³⁵ E atai ami angakarea ao nanokawakimi. E ongo ami tataro. Ana rau Ana motirawa bon ami bwai ngkai kam tabe ni kakantaningaia inanon te Onimaki.

Ngaira n tatabemaniira nako ti tangiraki iroun te Uea nakon are ti kona n ataia ke ni iangoia. ngke ti kantaningaa, te Uea, ti a riki “bwa aomata aika Itiaki rinanon [Ana] mwakuri ni kamaiu . . . ni kariaia, nimamanei, nanorinano, taotaona n nano, onrake n te tangira, n anga ma nanona bwai ni kabane aika E noori te Uea bwa a tau angana[kira], n aekan te nati ae bubutii nakon tamana.”³⁶

Aio te aekaki n bubuti are e anga te Tia kamaiu nakon Tamana inanon te Nne n aroka are i Ketetemwane. E butiia Ana Reirei, “Tantani ma ngai,” ngke tenea te tai are E oki nakoia ni kunea bwa a matuu.³⁷ N akean raonakina irouia ana reirei ao ni bon aki menan Tamana irouna, E rinea te Tia Kamaiu n uoti marakira ao rawawatara ao karirii n aekaia nako.”³⁸ Ma te anera e kanakoaki ni kakorakora,³⁹ E nanorinano ao E nima te mooi ae mao.⁴⁰ E kantaningaa Tamana ngke taku “E na tauaki am taeka,”⁴¹ ao E nanorinano ni karaoa ana mwakuri i bon i rouna.⁴² Ngkai ngai temanna mai ibuakoia Ana Abotoro ni boong aika kaitira, I tataro bwa ti na kakorakoraki n tiku ma Ngaia ao n tataningaa inanon ara bong nako.

N te ingabong n Tabati aio, I kaota au kaitau bwa n au kanganga”⁴³ ao ami kanganga ae moan te korakora, tiaki maroaa. Ngaia are e tararuaira “E na aki kiro ao E aki matu.”⁴⁴

A mena ikai Ana anera i akuun te roki “a katobibi[ra], n tabeki[ra] rake. 45I kaota au koaua ae onoti bwa ana berita ara Tia Kamaiu e bon koaua, bwa e taku, “Akana a kantaninga te Uea a na kaboui marurungia; a na mwemwerake ni baiia ni kiba n aiaroia ikare; a na biri, ma a na aki kua; a na nakonako ma a na aki mamaara.”⁴⁶ Ti na kantaningaia man kakorakoran te onimaki, bwa ti na atonga n ara tataro, “Ke e na tauaki am taeka,”⁴⁷ ao n oki Nakoina ma te karineaki. N aran ara Tia Kamaiu ao te Tia Kaboira ae tabu are Iesu Kristo, amen

Bwaai aika a na taraaki

1.

Taraa Moses 4:2.

2

Ruka 2:49

3.

Joseph Smith Translation, Matthew 3:24, in Bible appendix.

4.

Ruka 4:8.

5

Ruka 22:42

6.

Itaia 53:5; Motiaea 14:5.

7.

Mataio 27:46; Mareko 15:34

8.

Taraa Ruka 23:34

9.

Taraa Ioane 19:27

10.

Taraa Ioane 19:30.

11.

Taraa Doctrine ao Covenants 121:1

12.

Taian Areru 7:9 ; 12:2 Itaiia 8:17; 40:31; 2 Nibwaai 18:17.

13.

Taraa Doctrine ao Covenant 122:7

14.

Taraa Doctrine ao Covenants 121:1

15.

Taian Areru 30:5

16.

Mataio 6-10; 3 Nibwaai 13:10; taraa naba Mataio 26:39

17.

Aramwa 32:41.

18.

Mataio; Ruka11:2.

19.

2 Nibwaai 32:5.

20.

I-Rom 5:3.

21.

Doctrine ao Covenants 67:13.

22.

Aramwa 45:17.

23.

2 Nibwaai31:20.

24.

Moronaai 6:4.

25.

Doctrine ao Covenants 109:44.

26.

Aramwa 1:25.

27.

Aramwa 34:41.

28.

Ebera 10:35.

29.

Doctrine ao Covenants 98:3.

30.

Iobi 19:25–26.

31.

Iobi 13:15.

32.

2 Nibwaai 28:30.

33.

2 Nibwaai 28:30.

34.

Aia Reirei Beretitenti n te Ekaretia: David O. McKay (2003), xviii.

35.

Mataio 25:40

36.

Motiaea 3:19.

37.

Mataio 26:38; tarai naba kiibu 39–45.

38.

Aramwa 7:11.

39.

Taraa Ruka 22:43

40.

“In Memory of the Crucified,” *Hymns*, no. 190; taraa naba 3 Nibwaai 11:11; Doctrine ao Covenants 19:18–19.

41.

Mataio 26:42

42.

Taraa Doctrine ao Covenants 76:107; 88: 106; 133:50

43.

“Where Can I Turn for Peace?” *Hymns*, no. 129.

44.

Taian Areru 121:4.

45.

Doctrine ao Covenants 84:88.

46.

Itaia 40:31.

47.

Mataio 26:42.